



## INTRODUCZIUN

DA MARCEL KÖHLE

*Lucas, igl autur dils Fatgs dils apostels, descriva la fiasta da Tschuncheismas sco eveniment cun in grond effect. Tuts – senza distincziun – vegnan emplenì cun la forza dil sogn Spert. Gadius e pagauns capeschan in l'auter ed ei seformescha cuminonza denter ils carstgauns dallas differentas religiuns, culturas e lungatgs.*

*En quella maniera serevelescha Dieus. El muossa als carstgauns ch'el ei datier ad els e quei era suenter l'ascenziun da Jesus. Tras igl agir dil sogn Spert schenghegia Dieus a nus ina nova experientscha dall'unitad e dalla veta.*

## 1. LECZIUN

*Fatgs 2,1–11*

Cu il di da Tschuncheismas<sup>o</sup> ei arrivaus, fuvan tut ils giuvnals el medem liug. Cheu tuttenina ha ei dau ina ramur giu da tschiel, sco cu in suffel<sup>o</sup> vehement fracassa neutier, e quel ha emplenì l'entira casa, nua ch'ei fuvan. E lieungas sco da fiug ein cumparidas ad els e sespartidas e setschentadas sin in e scadin. Tuts ein vegni emplenì cun Spert sogn ed han entschiet a plidar en lungatgs jasters, sco quei ch'il Spert deva en ad els da s'exprimer.

A Jerusalem avdavan Gadius, pietus umens ord scadin pievel sut il tschiel. Cu ei ha dau ina tala ramur, ei la fuola currida ensemen e fuva tut perplexa, pertgei scadin udeva els a plidond en siu lungatg. Els sesmarvegliavan zun fetg e schevan: Ein buca tut quels che plaidan Galilès? Daco sa mintgin da nus udir els en siu lungatg mumma: Parts, Meds ed Elamits, avdents da Mesopotamia, Giudea e Cappadozia, Pontus ed Asia, Frigia e Pamfilia, dall'Egipta e dalla cuntrada da Libia viers Cirena, Romans, Gadius e proselits<sup>o</sup>, Crets ed Arabs – nus udir els a plidond en nos lungatgs dallas grondas ovas da Diu.

<sup>o</sup>Tschuncheismas fuva sper Pastgas e la fiasta dallas camonas la se-cunda gronda fiasta da pelegri-nadi dils Gadius  
<sup>o</sup>il vent ei simbol dil Spert sogn

<sup>o</sup>pagauns ch'ei seconverti tier il giudaisssem